



# Շուշանիկ Կուրդինյան

## Վաղն էլ կը մուրաք

Դուք՝ որ կյանքի մեջ անհաշտ ու դաժան՝  
Ուզեցիք հասնել մուրազի ափին  
Մենակ ձեզ համար, ամենքից բաժան՝  
Չլատված ուժով տիրել սարսափին .  
Որպես ոչխարի մոլորված հոտեր  
Ծովը թափվեցիք շնամ, առանց դեկ,  
Վերածնության լույսը ձեզ մոտ էր,  
Նրան չտեսաք, չզգացիք երբեք  
Այսօր՝ տանջանքի մրրկոտ ծովում,  
Մոտիկ անդունդին, հողմերից ծեծկված,  
Մենակ, անընկեր մահին եք գոհում  
Երբեմն խիզախ տենչերդ պաշտված . . .  
Այսօր՝ ձեր վաստակն արդար քրտինքի՝  
Ճարպոտ փորերին առատ կերակուր,  
Մինչդեռ դուք անհաց, գրկված անհոգի  
Ծծում եք կյանքի թույն, լեղին մրուր:  
Այսօր՝ կուշտերս վայելքին գերի  
Ապրում ենք հանգիստ, անվիշտ անվաստակ  
Ձեր բանուկ ձեռքը խոնարհ է, բարի,  
Այսօր մեզ տվեք, վաղն էլ՝ կը մուրաք . . .

1907 թ. 20 դեկտեմբերի